

ARAN PERA INDEPENDÈNCIA

Es jossignants, araneses e aranesi, membres de plen dret, collaborators e simpatizants dera Assemblada Nacionau Catalana en Aran, *Aran pera Independència*, en aguesti moments en qu'un sector majoritari deth pòble, des fòrces politiquas e des institucions de Catalonha manifèsten e proclamen era sua decidida voluntat de caminar entera constitucion d'un Estat catalan liure e independent,

CONSTATAM:

1. Qu'Aran ei ua realitat nacionau de lengua e cultura occitana, damb identitat pròpia e integrada en Catalonha de manèra voluntària e pactada de hè sègles.
2. Que, laguens de Catalonha, eth pòble aranés a gaudit tostemps de plena libertat de hèr e decidir, canalizada e exprimida a traùs d'institucions d'autogovèrn pròpies.
3. Que, tant en passat com en present, eth pòble e es institucions de Catalonha, an respectat, arreconeishut e protegit tostemps era lengua, era cultura, es drets istorics, es institucions, era voluntat d'autogovèrn, e era identitat occitana deth pòble aranés.
4. Qu'es ligams istorics, politics, administratius, culturaus e afectius que dempús es sègles estaquen Aran damb Catalonha, an favorit e favorissen eth progrès, era riquesa e eth desenvolopament sociiau, economic e culturau dera comunitat aranesa, e, ath madeish temps, constituïssen eth principau estrument qu'a garantit e garantís era sua identitat lingüística e culturau, es sòns drets istorics, es sues institucions d'autogovèrn, e era sua perviuença coma pòble.

E, per'mor d'aquerò,

MANIFESTAM:

1. Eth nòste plen compromís e supòrt ath pòble e as institucions de Catalonha entà arténher era sua plena libertat e independència, exprimida e concretada en assolitatge d'un Estat sobeiran.
2. Era nòsta fòrta e decidida voluntat e desir de que, sense renunciar a èster e sentir-se part dera grana nacion occitana, Aran mantengue aqueri fòrti ligams en tot integrar-se plenament en futur Estat catalan coma realitat nacionau diferenciada, damb personalitat e expression politica e administratiua pròpia, entà establir un dialòg entre iguals damb eth pòble catalan e es sues institucions.

E, en conseqüència,

DEMANAM:

1. A totes es araneses e aranesi, as fòrces politiquas e as institucions d'Aran, que s'ahigen e colloboren actiuament damb eth pòble, es fòrces politiquas, e es institucions catalanes, en procés de reivindicacion e constitucion der Estat catalan.
2. Ath pòble, as fòrces politiquas e as institucions de Catalonha que, laguens deth futur Estat catalan, garantisquen er assolitatge dera mès nauta e plena autonomia lingüística, culturau, politica, economica e administrativa possible entà Aran.
3. A toti es membres dera nacion occitana, que manifèsten eth sòn plen supòrt ara reivindicacion deth pòble catalan e deth pòble aranés per'mor que Catalonha sigue un Estat liure e independent e Aran acompanhe er impuls qu'a de besonh Occitània entà arténher es legitimes aspiracions deth pòble occitan.